

“TASDIQLANGAN”
“KAFIL SUG'URTA” AJ
Boshqaruv raisi F.A.Artikov
2024- yil 5- yanvar

JISMONIY SHAXSLARNI BAXTSIZ HODISADAN SUG'URTA QILISH UCHUN OMMAVIY OFERTA

Ushbu Ommaviy oferta (bundan buyon matnda Oferta deb yuritiladi) **“KAFIL-SUG'URTA” AJ** ning (bundan buyon matnda Sug'urtalovchi deb yuritiladi) noma'lum doiradagi jismoniy shaxslarga (bundan buyon Sug'urta qildiruvchi deb yuritiladi) yullangan quyidagi sug'urta shartlarida sug'urta shartnomasini Sug'urtalovchining axborot tizimlari vositasida tuzish taklifi bulib hisoblanadi. Sug'urtalovchi va Sug'urta qildiruvchi shartnoma taraflaridir.

Mazkur Ofepta shartlarining qabul qilinishi va shartlashilgan sug'urta mukofotining to'lanishi uning shartlarini akseptlash hamda Sug'urta qildiruvchining Sug'urta shartnomasini tuzishga roziligi bo'lib hisoblanadi. Sug'urta qildiruvchi tomonidan sug'urta mukofoti to'langanligi fakti tasdiqlanganidan keyin unga elektron sug'urta polisi yuboriladi va Sug'urta shartnomasi tuzilgan deb hisoblanadi.

O'zbekiston Respublikasi Fuqarolik kodeksining 370-moddasiga muvofiq Oferta shartlarining qabul qilinishi mazkur Oferta shartlarini so'zsiz qabul qilingan deb hisoblanadi va u bilan quyidagilarga rozilik ifodalanadi:

- mazkur Oferta shartlari, jumladan unda bayon qilingan sug'urta shartlariga rozilik;
- arizani to'ldirishda ko'rsatilgan shaxsga doir ma'lumotlar bilan sug'urta faoliyatini amalga oshirish maqsadida avtomatlashtirilgan yoki avtomatlashtirilmagan tarzda ishlov berish yuli orqali 5 yil muddatga ishlashga, jumladan ularni yig'ish, tizimlashtirish, to'plash, saqlash, aniqlashtirish, ulardan foydalanish, ularni egasini ko'rsatmaslik, bloklash, yo'q qilishga (yo'q qilish haqida xabar qilmagan holda), shuningdek sug'urta shartnomasini bajarish, ichki hujjat aylanmasini ta'minlash maqsadida uchinchi shaxslarga ularni berishga rozilik.

Sug'urta qildiruvchi Sug'urtalovchining internet resursi vositasida Sug'urta shartnomasini tuzish natijasida o'z huquqi va muomalaga layoqatligini tasdiqlaydi, shuningdek o'z zimmasiga yuklatilgan majburiyatlar yuzasidan javobgarlikni anglaydi.

Sug'urtalovchining internet resursida onlayn tarzda Sug'urta shartnomasini tuzish uchun Sug'urta qildiruvchidan uning elektron pochta manzili (agar bor bo'lsa) va mobil telefon raqami mavjudligi talab qilinadi.

Sug'urta qildiruvchi tomonidan Sug'urtalovchining internet resursida Sug'urta shartnomasini tuzish uchun zarur va muhim bo'lgan barcha ma'lumotlarni kiritish Sug'urta uchun ariza bo'lib hisoblanadi.

Sug'urtalovchi O'zbekiston Respublikasi Fuqarolik Kodeksining 933-moddasiga muvofiq sug'urta siri saqlashga javobgar bo'ladi. «Oferta», «Sug'urta shartnomasi» va «Sug'urta polisi» havolalari bundan buyon matnda mazkur elektron hujjatga nisbatan bir xil ahamiyatga ega bo'ladi.

1. UMUMIY SHARTLAR

1.1. Mazkur “Jismoniy shaxslarni baxtsiz hodisalardan” sug'urtalash Ofertasi (keyingi o'rinlarda - «Oferta») sug'urta faoliyatini tartibga soluvchi O'zbekiston Respublikasi qonun hujjatlariga muvofiq ishlab chiqilgan va “KAFIL SUG'URTA” aksiyadorlik jamiyatining (keyingi o'rinlarda – “Sug'urtalovchi”) jismoniy shaxslarni baxtsiz hodisalardan sug'urtalash shartlarini belgilab beradi.

1.2. Mazkur Oferta O'zbekiston Respublikasining qonunchiligiga muvofiq, umumiy sug'urta sohasining “Baxtsiz hodisalardan ehtiyot shart sug'urta qilish” 1-klassi Qoidalari asosida ishlab chiqilgan,

O'zbekiston Respublikasida doimiy yashaydigan fuqaroligiga ega bo'lgan shaxslarni, sug'urta qilish tartibi va shartlarini belgilab beradi.

1.3. "KAFIL SUG'URTA" aksiyadorlik jamiyati (keyingi o'rinlarda «Cug'urtalovchi» deb ataladi) jismoniy shaxslar bilan baxtsiz hodisalaridan sug'urtalash shartnomalari (sug'urta polislari) ni tuzib, sug'urta shartnomasi (sug'urta polisi) da ko'rsatilgan haq (sug'urta mukofoti) evaziga Sug'urta qildiruvchining yoki Sug'urta shartnomasi (sug'urta polisi) da ko'rsatilgan boshqa shaxslarning (Sug'urtalangan shaxslarning) sog'lig'i va/yoki hayotiga zarar yetkazilganda (sug'urta hodisasi yuz berganda) shartnoma (polis) da shartlashilgan sug'urta summasi doirasida sug'urta to'lovlarini amalga oshiradi.

1.4. Ushbu Ofertada foydalanilgan atamalar quyidagicha ta'riflanadi:

Sug'urta shartnomasi – Sug'urtalovchi va sug'urta qildiruvchi o'rtasidagi yozma kelishuv bo'lib, unga binoan Sug'urtalovchi shartnoma bilan kelishilgan haq (sug'urta mukofoti) evaziga shartnomada ko'rsatilgan voqea (sug'urta hodisasi) yuz berganda sug'urta qoplamasi (sug'urta puli) ni to'lash majburiyatini oladi.

Sug'urta qildiruvchi - Sug'urtalovchi bilan sug'urta shartnomasi (polisi)ni tuzgan O'zbekiston Respublikasining muomala layoqatiga ega bo'lgan fuqarolari, O'zbekiston Respublikasida doimiy yashaydigan chet el fuqarolari, hamda O'zbekiston hududida faoliyat ko'rsatayotgan yuridik shaxslar.

Sug'urtalangan shaxs – hayoti va/yoki sog'lig'i bilan bog'liq mulkiy manfaatlari sug'urta ob'ekti bo'lgan va sug'urta shartnomasi uning foydasiga tuzilgan jismoniy shaxs.

Sug'urta polisi – Yagona avtomatlashtirilgan axborot tizimi tomonidan real vaqt rejimida shakllantirilgan seriya, raqamiga ega bo'lgan sug'urta qilish amalga oshirilganligini tasdiqlovchi hujjat.

SMS xabar – (inglizcha Short Message Service — «Qisqa xabarlar xizmati») — mobil telefon orqali qisqa matnli xabarlarni jo'natish va qabul qilish imkonini beruvchi texnologiya bo'lib, mobil aloqalar standartiga kiradi.

Naf oluvchi – Sug'urtalangan shaxsning yozma roziligi bilan sug'urta shartnomasi (sug'urta polisi) ga ko'ra sug'urta to'lovini oluvchi jismoniy yoki yuridik shaxs.

Sug'urta shartnomasi (sug'urta polisi) da Naf oluvchi ko'rsatilmagan bo'lsa va sug'urtalangan shaxs halok bo'lsa, sug'urtalangan shaxsning merosxo'rlari naf oluvchi bo'ladilar.

Sug'urta summasi – Sug'urta shartnomasi (sug'urta polisi) da belgilangan va Sug'urtalovchining Sug'urta qildiruvchi oldidagi majburiyatlarining chegarasini anglatadigan pul mablag'lari miqdori.

Sug'urta mukofoti – Sug'urta qildiruvchi Sug'urtalovchiga belgilangan tartib va muddatlarda to'lashi shart bo'lgan haq.

Sug'urta to'voni – Sug'urtalangan shaxs yoki Naf oluvchiga sug'urta shartnomasida ko'rsatilgan sug'urta hodisasi ro'y berganda sug'urta summasi chegarasida to'lanadigan pul mablag'lari.

Baxtsiz hodisa – odam organizmiga tashqi ta'sir ko'rsatgan va tana jarohatiga yoki sog'lig'iga boshqa zarar yetishiga olib kelgan, sug'urtalangan shaxsning irodasiga bog'liq bo'lmagan ravishda to'satdan, qisqa vaqt oralig'ida sodir bo'lgan voqea.

Sog'lig'iga boshqa zarar yetishi:

a) kuyish, yashin urishi yoki elektr tokining ta'sirida tan jarohatlari olish;

b) kimyoviy (sanoat yoki maishiy) moddalardan zaharlanish va/yoki zaharli va/yoki kuydiradigan moddalar, bug' yoki gazlardan nafas olish yoki ularga tegish natijasida zaharlanish, kuyish;

v) sovuq urishi, cho'kish, odam yoki hayvonlarning hujumi, quyosh urishi, narsalarning nafas yo'llariga to'satdan kirib qolishi, zaharli o'simliklardan o'tkir zaharlanish, shuningdek, transport vositalarida (avtomobil, poyezd, tramvay va b.) yoki ular falokatga uchraganda, mashinalar, mexanizmlar va turli xil asbob-uskunalaridan foydalanganda olingan jarohatlar.

Sug'urta davri – Sug'urta shartnomasi (polisi) da ko'rsatilgan, Sug'urtalovchi majburiyatlari amalda bo'ladigan davr.

2. SUG'URTA SUBYEKTLARI

Sug'urtalovchi, sug'urta qildiruvchi, sug'urtalangan shaxslar va naf oluvchilar sug'urta subyektlari hisoblanadilar.

3. SUG'URTA OBYEKTI

Ushbu Ofertaga muvofiq sug'urtalangan shaxsning O'zbekiston Respublikasi qonunchiligiga zid bo'lmagan, hayoti va sog'lig'i bilan bog'liq mulkiy manfaatlarini sug'urta ob'ektidir.

4. SUG'URTA HODISALARI

4.1. Ushbu Ofertaga muvofiq sug'urta hodisasi bo'lib baxtsiz hodisa natijasida yuzaga kelgan quyidagi hodisalar hisoblanadi:

4.1.1. Sug'urtalangan shaxs tan jarohati olishi va/yoki sog'lig'iga boshqa zarar yetishi;

4.1.2. Sug'urtalangan shaxsning guruh nogironi bo'lishi;

4.1.3. Sug'urtalangan shaxsning halok bo'lishi.

4.2. 4.1-bandda ko'rsatilgan voqealar sug'urta hodisasi deb tan olinmaydi va ular bo'yicha to'lovlar amalga oshirilmaydi, agar:

4.2.1. voqea quyidagilar natijasida ro'y bersa:

a) har qanday tavsifdagi harbiy harakatlar (urush e'lon qilinganligi yoki qilinmaganligidan qat'iy nazar), terrorchilik harakatlari, fuqarolar urushlari, inqilob, qo'zg'olon yoki boshqa shunga o'xshash tartibsizliklar, shu jumladan ichki tartibsizliklar (mitinglar, g'alayonlar, ish tashlashlar, namoyishlar);

b) tabiiy ofatlar, yadroviy portlash, ionli radiatsiya yoki yadroviy yoqilg'i yonishi yoki sirqib chiqishi natijasida ifloslanishi. Ushbu istisno doirasida yonish deganda atomlarning har qanday parchalanishi jarayoni ham tushuniladi.

4.2.2. voqea quyidagilar bilan bog'liq ravishda ro'y bersa:

a) epidemiya;

b) Sug'urtalangan shaxs alkogol, giyohvand yoki toksik moddalardan mast bo'lishi, transport vositasini mast holatda boshqarishi, shuningdek transport vositasini alkogol, giyohvand yoki toksik moddalardan mast bo'lgan shaxsga berishi;

v) o'z joniga qasd qilish yoki o'z joniga qasd qilishga urinishi;

g) tergov idoralari yoki sud tomonidan sug'urtalangan shaxsning harakatlarida qasddan qilingan jinoyat alomatlarini aniqlanishi;

d) tergov idoralari yoki sudning qarori bilan sug'urtalangan shaxs mayda bezorilikda yoki mushtlashishda aybdor deb topilsa, sug'urtalangan shaxs o'z fuqarolik burchini ado etishi yoki o'zining yoki uchinchi shaxslarning hayoti, salomatligi, sha'ni va obro'sini himoya qilish bilan bog'liq harakatlari bundan mustasno;

e) tashxis qo'yish, davolash va profilaktika choralarining (shu jumladan dorilar in'eksiyasining), agar ular baxtsiz hodisa natijasida kelib chiqqan tan jarohatini davolash bilan bog'liq bo'lmasa.

4.3. Quyidagi hodisalar sug'urta hodisasi hisoblanmaydi: hamma turdagi kasalliklar, shu jumladan kasb va yuqumli kasalliklar, teri-tanosil kasalliklari, shu jumladan OITV va OITS, shuningdek dori-darmonlar va oziq-ovqatlarni iste'mol qilishdan kelib chiqqan kasalliklar.

4.4. Sug'urta shartnomasi O'zbekiston Respublikasi hududida amal qiladi.

5. SUG'URTA SHARTNOMASINI TUZISH TARTIBI VA MUDDATI

5.1.1. Mazkur sug'urta shartnomasi Sug'urtalovchi tomonidan Sug'urta qildiruvchiga sug'urta xizmatlarini sotish va ko'rsatish shartlarini belgilaydigan elektron hujjat bo'lib hisoblanadi;

5.1.2. Sug'urta shartnomasi (sug'urta polisi) Sug'urta qildiruvchi tomonidan Sug'urtalovchiga axborot tizimlaridan foydalangan holda takdim etilgan ma'lumotlar asosida shakllanadi;

5.1.3. Sug'urta qildiruvchi elektron arizaning to'ldirilishi shart bo'lgan kataklarini mustaqil va arizada ko'rsatilgan hujjatlarning aslidagi ma'lumotlarga qat'iy muvofiq holda to'ldiriladi;

5.1.4. Sug'urta qildiruvchi arizada ko'rsatilgan hujjatlarning ishonchiligi va asliga to'g'ri ekanligi uchun zimmasiga javobgarlikni oladi, shuningdek arizada ko'rsatilgan hujjatlarni ularning asliga muvofiq bo'lmaganida sug'urta hodisasi yuz bergan taqdirda, Sug'urtalovchi sug'urta to'lovni to'lashni rad etish huquqiga ega ekanligiga rozi bo'ladi;

5.1.5. Arizada ko'rsatilgan va unga kiritilgan hujjatlarning ma'lumotlari avtomatik ravishda Sug'urta shartnomasiga (Sug'urta polisi) kiritiladi.

5.1.6. Sug'urta qildiruvchi Sug'urtalovchining axborot tizimi yordamida sug'urta summasini mustaqil aniqlaydi, Sug'urtalovchining axborot tizimi esa Sug'urta qildiruvchi tomonidan ko'rsatilgan ma'lumotlardan va tanlangan variantlardan kelib chiqib, sug'urta mukofoti summasini shakllantiradi hamda

Sug'urta qildiruvchi sug'urta mukofotining shakllantirilgan summasiga rozi bo'lgan taqdirda, uni to'lashga qadar Sug'urta qildiruvchi mazkur Oferta matni bilan tanishish majburiyatini oladi.

5.1.7. Ofertada taklif qilinadigan sug'urta shartlariga rozi bo'lgan taqdirda, Sug'urta qildiruvchi Sug'urtalovchining axborot tizimida o'z roziligini tasdiqlaydi va Sug'urta shartnomasini tuzish uchun arizani (bundan buyon matnda Ariza deb yuritiladi) Sug'urtalovchining axborot tizimidan foydalangan holda onlayn tarzda to'ldirishga kirishadi.

5.1.8. Arizani to'ldirishda Sug'urtalovchi uchun sug'urta hodisasi yuz berishi ehtimolini aniqlashda muhim ahamiyatga ega bo'lgan barcha zarur ma'lumotlarni va sug'urta hodisasi yuz berishidan ko'rilishi mumkin bo'lgan zararlar miqdorini (sug'urta tavakkalchiligini) ko'rsatish talab qilinadi. Barcha ma'lumotlar hujjatlarning asliga qat'iy muvofiqlikda ko'rsatilishi kerak.

5.1.9. Ariza to'ldirilganidan keyin, Sug'urtalovchining axborot tizimi tomonidan «Sug'urta mukofotini to'lash va Sug'urta polisini rasmiylashtirish» tugmasidan foydalanishga avtomatik tarzda ruxsat beriladi.

5.1.10. Sug'urta shartnomasi taraflari Sug'urta qildiruvchi tomonidan Sug'urta polisining olinishi Sug'urta shartnomasi (Sug'urta polisi) lozim darajada imzolanganligini tasdiqlaydi.

5.1.11. Sug'urta qildiruvchining Sug'urta mukofotini to'laganligi fakti Sug'urtalovchining axborot tizimi tomonidan tasdiqlangan sana mazkur Ommaviy oferta aksept qilingan va Sug'urta shartnomasi tuzilgan sanadir.

5.2. Sug'urta shartnomasi (polislari) bo'yicha to'lovni amalga oshirish tartibi:

5.2.1. Sug'urta shartnomasi (polisi) bo'yicha to'lovni amalga oshirish Sug'urtalovchi tomonidan qo'llaniladigan axborot (onlayn) tizimlaridan foydalangan holda amalga oshiriladi;

5.2.2. To'lov tizimining himoyalangan kanaliga keyingi qayta yo'naltirish uchun ariza qabul qilinganligini tasdiqlash Sug'urtalovchi tomonidan Sug'urta qildiruvchi arizani to'ldirayotganida ko'rsatib o'tgan mobil telefon raqamiga SMS-xabarni jo'natish yo'li bilan amalga oshiriladi;

5.2.3. SMS-xabar tasdiqlash kodi bilan birga olinganidan keyin Sug'urta qildiruvchi elektron to'lov tizimini tanlashi zarur, undan keyin u sug'urta mukofotining hisoblangan summasini Sug'urtalovchining hisob raqamiga o'tkazish uchun tanlangan to'lov tizimining saytiga avtomatik tarzda qayta yo'llanadi;

5.2.4. Sug'urta polisi uchun sug'urta mukofoti to'langanligi haqidagi tasdiq olinganidan keyin Sug'urtalovchining axborot tizimi Sug'urta polisini rasmiylashtirishni elektron shaklda avtomatik tarzda amalga oshiradi, Sug'urta qildiruvchining kiritgan telefon raqamiga Sug'urta polisining seriyasi, raqami va Sug'urta polisi elektron tarzda jo'natilganligi fakti haqidagi ma'lumotlarni ichiga olgan SMS-xabar jo'natilishi yo'li bilan Sug'urta qildiruvchini xabardor qiladi. SMS xabarda sug'urta polisini yuklab olish imkonini beruvchi havola mavjud bo'ladi.

5.2.5. Sug'urtalovchi to'lov provayderining harakatlari/harakatsizligi uchun, shuningdek Sug'urta qildiruvchining elektron to'lovlar tizimi va internet orqali to'lash bilan bog'liq zararlari va tavakkalchiliklari uchun javobgar bo'lmaydi.

5.2.6. Sug'urta mukofotini bank kartasi bilan to'lash bevosita Sug'urta qildiruvchi (Naf oluvchi) - karta egasi tomonidan amalga oshirilishi kerak. Agap Sug'urta qildiruvchi bank kartasini to'lov to'lash uchun boshqa shaxsga bergan bo'lsa, Sug'urta qildiruvchi bu bilan bog'liq barcha tavakkalchiliklarni o'z zimmasiga oladi va mazkur holatda sug'urta mukofotini to'lash Sug'urta qildiruvchi tomonidan amalga oshirilgan deb hisoblanishiga rozi bo'ladi.

5.2.7. Sug'urtalovchining axborot tizimida «Sug'urta mukofotini to'lash va Sug'urta polisini rasmiylashtirish» tugmasini bosish bilan, shuningdek shakllantirilgan sug'urta mukofotini to'lagan holda Oferta yo'llangan shaxs O'zbekiston Respublikasi Fuqarolik kodeksining 370-moddasiga muvofiq mazkur Oferta shartlariga rozi ekanligini bildiradi.

5.3. Sug'urta qildiruvchi (yo'lovchi) Sug'urta shartnomasi (Sug'urta polisi)ning shaharlararo avtobus shoxbekatidan yo'nalishi bo'yicha shoxbekatga borib yetgunga qadar sug'urtalangan hisoblanadi.

6. SUG'URTA SUMMASI, SUG'URTA MUKOFOTINI TO'LASH TARTIBI

6.1. Sug'urta qildiruvchi Sug'urtalovchining axborot tizimi yordamida sug'urta summasini mustaqil aniqlaydi, uning eng kam miqdori 10 000 000,00 (o'n million) so'm miqdorida bo'ladi. Sug'urtalovchining axborot tizimi esa Sug'urta qildiruvchi tomonidan ko'rsatilgan ma'lumotlardan va tanlangan variantlardan kelib chiqib, sug'urta mukofoti summasini shakllantiradi.

6.2. Sug'urta tarifi yillik 0,3 foiz miqdorida belgilanadi. Sug'urta shartnomasi (sug'urta polisi) bo'yicha sug'urta mukofotining miqdori sug'urta summasini sug'urta tarifiga ko'paytirish orqali Sug'urtalovchi tomonidan aniqlanadi. Sug'urta mukofoti qo'shimcha qiymat solig'isiz hisoblanadi.

6.3. Sug'urta mukofoti to'lovi Sug'urtalovchiga bank kartasi bilan bevosita karta egasi tomonidan amalga oshiriladi. Sug'urta mukofotini Sug'urtalovchiga Agap Sug'urta qildiruvchi bank kartasini to'lov to'lash uchun boshqa shaxsga bergan bo'lsa, Sug'urta qildiruvchi bu bilan bog'liq barcha tavakkalchiliklarni o'z zimmasiga oladi va mazkur holatda sug'urta mukofotini to'lash Sug'urta qildiruvchi tomonidan amalga oshirilgan deb hisoblanishiga rozi bo'ladi. Sug'urta mukofoti qo'shimcha qiymat solig'isiz hisoblanadi.

6.4. Agar Sug'urta qildiruvchi sug'urta shartnomasi (sug'urta polisi) bilan bir necha shaxsni sug'urtalasa, sug'urta shartnomasida ushbu Ofertalardagi shartlarga muvofiq sug'urtalanishi lozim bo'lgan har bir sug'urtalangan shaxsning sug'urta summasi ko'rsatiladi.

6.5. Agar Sug'urta qildiruvchiga yoki Naf oluvchiga sug'urta to'lovi amalga oshirilsa, sug'urta puli ushbu sug'urta to'lovi miqdorida kamayadi. Sug'urta summasi sug'urta to'lovi amalga oshirilgan paytdan boshlab kamaygan hisoblanadi.

6.6. 1 (bir) yildan kam muddatga Sug'urta shartnomasi tuzilayotganda sug'urta mukofoti miqdori yillik sug'urta mukofot miqdoridan sug'urta muddati uchun quyidagi miqdorda belgilanadi.

15 kundan 30 kungacha	20%	181-210 kungacha	70%
31 kundan 60 kungacha	25%	211-240 kungacha	75%
61 kundan 90 kungacha	30%	241-270 kungacha	80%
91-120 kungacha	40%	271-300 kungacha	85%
121-150 kungacha	50%	301-330 kungacha	90%
151-180 kungacha	60%	331-365 kungacha	95%

7. SUG'URTA SHARTNOMASI (SUG'URTA POLISI)NING AMAL QILISH MUDDATI

7.1. Sug'urta shartnomasi (sug'urta polisi) bir yilgacha bo'lgan muddatga va bir yildan ortiq muddatga tuzilishi mumkin.

7.2. Sug'urta shartnomasi (sug'urta polisi) ning eng kam muddati 15 (o'n besh) kundan kam bo'lmagan muddatga tuzilishi mumkin.

7.3. Sug'urta shartnomasi (sug'urta polisi), shu jumladan, Sug'urtalovchi majburiyatlari, agar unda boshqa shart ko'rsatilmagan bo'lsa, Sug'urtalovchi hisob raqamiga sug'urta mukofoti kelib tushgan kundan keyingi kun, soat 00-00 da kuchga kiradi.

7.4. Sug'urta shartnomasi (sug'urta polisi) ning amal qilishi sug'urta polisida ko'rsatilgan oxirgi kuni, soat 24-00 da tugaydi.

8. TOMONLARNING HUQUQ VA MAJBURIYATLARI

8.1. Sug'urtalangan shaxsning huquqlari:

a) Sug'urta shartnomasini tuzish paytida Naf oluvchini tayinlashi;

b) Sug'urta shartnomasi (sug'urta polisi) amalda bo'lgan davrda Sug'urtalovchiga Naf oluvchini almashtirishni so'rab murojaat etishi;

v) Sug'urta qildiruvchidan/sug'urtalovchidan sug'urta shartnomasi (sug'urta polisi) haqida ma'lumot berishni so'rashi;

g) sug'urta hodisasi ro'y berganda uning foydasiga tuzilgan sug'urta shartnomasi (sug'urta polisi) bo'yicha Sug'urtalovchi majburiyatlarining bajarilishini talab qilishi;

d) Sug'urta qildiruvchi vafot etgan taqdirda Sug'urtalovchiga sug'urta shartnomasini qayta rasmiylashtirish taklifi bilan murojaat etishi.

8.2. Sug'urtalovchining majburiyatlari:

a) Sug'urta qildiruvchiga sug'urta mukofoti to'langandan so'ng uch kunlik muddat ichida sug'urtalash Ofertalari yoki ulardan ko'chirma bilan birgalikda sug'urta polisini berishi, elektron to'lov tizimlari orqali tuzilgan sug'urta shartnomalari bo'yicha sug'urta polisini Sug'urtalovchining ma'lumotlar bazasida ro'yxatga olishi;

b) sug'urta hodisasi ro'y berganda sug'urtalangan shaxsga yoki Naf oluvchiga sug'urta shartnomasida ko'rsatilgan tartib va muddatlarda sug'urta qoplamasi to'lovini amalga oshirishi;

v) sug'urta sirini oshkor qilmaslik.

8.3. Sug'urtalovchining huquqlari:

a) Sug'urtalangan shaxs yoki Naf oluvchi sug'urta to'lovini talab qilganda sug'urtalangan shaxs yoki Naf oluvchidan sug'urta shartnomasi bo'yicha majburiyatlarini, shu jumladan sug'urta qildiruvchi zimmasida bo'lgan, lekin u bajarmagan majburiyatlarni bajarilishini talab qilishi. Majburiyatlarni bajarilmasligi yoki o'z vaqtida bajarilmasligi qaltisligi sug'urtalangan shaxs yoki Naf oluvchi zimmasidadir;

b) Sug'urta shartnomasini tuzib bo'lgandan keyin Sug'urta qildiruvchi Sug'urtalovchiga sug'urta shartnomasini tuzayotganda yolg'on ma'lumotlarni taqdim etganligi aniqlansa, sug'urta shartnomasini haqiqiy emas deb topishni va O'zbekiston Respublikasi amaldagi qonunchiligida nazarda tutilgan holatlarning qo'llanilishini talab qilishi.

Agar Sug'urta qildiruvchi xabar qilmagan holatlar o'tib ketgan bo'lsa, Sug'urtalovchi sug'urta shartnomasini haqiqiy emas deb topishni talab qila olmaydi.

v) Sug'urtalangan shaxsga o'zining ishonchli shifokor-mutaxassisini uning ahvolini tekshirish va kasallik tarixini o'rganish uchun yuborishi;

g) quyidagi hollarda sug'urta qoplamasini to'lashni rad etishi:

agar Sug'urta qildiruvchi yoki Sug'urtalangan shaxs yoki Naf oluvchi:

- ro'y bergan baxtsiz hodisa haqida Sug'urtalovchiga o'z vaqtida xabar bermasa;

- sug'urta hodisasi ro'y berganligini, shuningdek ro'y bergan natija bilan bu hodisaning bog'liqligini tasdiqlovchi hujjatlar va ma'lumotlarni taqdim etmasa yoki oldindan noto'g'ri ekanligi ma'lum bo'lgan dalil va isbotlarni taqdim etsa;

- Sug'urtalovchining shifokor-mutaxassisi jabrlangan shaxsni ko'rikdan o'tkazishiga imkoniyat berish choralarini ko'rmasa.

d) qaltislik oshishiga olib keluvchi holatlar haqida xabar topganda, sug'urta shartnomasining shartlarini o'zgartirishni yoki qo'shimcha sug'urta mukofoti to'lashni talab qilishi;

e) sug'urta hodisasidan boshqa sabablarga ko'ra sug'urta hodisasining ro'y berishi ehtimolining yo'qolishi bilan sug'urta shartnomasi muddatidan oldin bekor qilinganda (masalan, sug'urta hodisasidan boshqa sabablarga ko'ra Sug'urtalangan shaxs vafot etganda), Sug'urtalovchi u amal qilgan davrga mutanosib bo'lgan sug'urta mukofotiga haqli.

8.4. Sug'urta qildiruvchining majburiyatlari:

a) Sug'urta shartnomasini tuzish paytida Sug'urtalovchiga sug'urta hodisasi ro'y berishi ehtimolini va u yuz bersa qancha zarar yetishi mumkinligini aniqlashda sezilarli ahamiyatga ega, unga ma'lum bo'lgan barcha holatlar haqida xabar berishi;

b) Sug'urta shartnomasi amalda bo'lgan davrda Sug'urtalovchiga sug'urta shartnomasini tuzish paytida xabar qilingan tavsilotlarning unga ma'lum bo'lgan sezilarli o'zgarishlari haqida xabar berishi. Ariza-so'rovnomada ko'rsatilgan ma'lumotlarning o'zgarishi sezilarli o'zgarishlar deb hisoblanadi;

v) baxtsiz hodisa sodir bo'lganda u sodir bo'lgan paytdan boshlab 30 (o'ttiz) kundan kechiktirmay Sug'urtalovchini uning sodir bo'lganligi haqida xabardor qilishi;

g) Sug'urta shartnomasi tuzilganda sug'urtalangan shaxsni va Naf oluvchini huquq va majburiyatlari bilan tanishtirishi;

d) Sug'urtalangan shaxsga Sug'urta shartnomasi haqida ma'lumot taqdim etishi.

8.5. Sug'urta qildiruvchining huquqlari:

a) Sug'urtalangan shaxsni uning va Sug'urtalovchi roziligi bilan almashtirishi;

b) Sug'urta shartnomasida ko'rsatilgan Naf oluvchini Sug'urtalovchini yozma xabardor qilgan holda boshqa shaxsga almashtirishi. Sug'urtalangan shaxsning roziligi bilan Naf oluvchini almashtirish faqat mazkur shaxsning roziligi bilan amalga oshirilishi mumkin.

Naf oluvchi, agar u sug'urta shartnomasi bo'yicha ma'lum bir majburiyatni bajargan bo'lsa yoki Sug'urtalovchiga sug'urta to'lovi talabi bilan murojaat etgan bo'lsa, boshqa shaxs bilan almashtirilishi mumkin emas.

8.6. Naf oluvchi foydasiga sug'urta shartnomasining tuzilishi, agar sug'urta shartnomasida boshqa shartlar keltirilmagan bo'lsa yoki Sug'urta qildiruvchining majburiyatlari sug'urta shartnomasi foydasiga tuzilgan shaxs tomonidan bajarilmagan bo'lsa, Sug'urta qildiruvchini ushbu shartnoma bo'yicha majburiyatlardan ozod qilmaydi.

9. TOMONLARNING JAVOBGARLIGI

9.1. Mazkur Ofert asosida tuzilgan Sug'urta shartnomasi shartlarini bajarmaganlik yoki kerakli darajada bajarmaganlik uchun Tomonlar O'zbekiston Respublikasining amaldagi qonunchiligiga muvofiq javobgarlikka tortiladi.

10. SUG'URTA DA'VOSINI KO'RIB CHIQISH TARTIBI

10.1. Sug'urtalovchi sug'urta to'lovni to'lovini sug'urtalangan shaxsning yoki Naf oluvchining sug'urta hodisasi haqidagi yozma arizasi va unga ilova qilingan – mazkur Ofertaning 10.2-bandda ko'rsatilgan tasdiqlovchi hujjatlar asosida amalga oshiradi.

10.2. Arizaga quyidagi hujjatlar ilova qilinadi:

10.2.1. Sug'urtalangan shaxs tan jarohat olishi va/yoki sog'lig'iga boshqa zarar yetganda:

- Sug'urta polisi / elektron sug'urta polisi;
- kasallik tarixidan (davolanish daftaridan) ko'chirma;
- rentgen suratlaridan nusxa;
- Sug'urtalangan shaxsning pasporti yoki tug'ilganligi haqida guvohnomadan nusxa.

10.2.2. Sug'urtalangan shaxs guruh nogironi bo'lganda:

- Sug'urta polisi / elektron sug'urta polisi;
- kasallik tarixidan (davolanish daftaridan) ko'chirma;
- TMEK ma'lumotnomasi;
- Sug'urtalangan shaxsning pasporti yoki tug'ilganligi haqida guvohnoma.

Sug'urtalovchi tomonidan sug'urta hodisasi haqiqatda ro'y berganligini aniqlash uchun zarur bo'lgan boshqa hujjatlar talab qilinishi mumkin.

10.2.3. Sug'urtalangan shaxs sug'urta hodisasi natijasida halok bo'lganda:

- Sug'urta polisi / elektron sug'urta polisi;
- kasallik tarixidan (davolanish daftaridan) ko'chirma;
- Sug'urtalangan shaxsning o'limi haqidagi guvohnoma;
- Naf oluvchining pasporti.

Sug'urtalovchi tomonidan sug'urta hodisasi haqiqatda ro'y berganligini hamda sug'urta to'lovni miqdorini aniqlash uchun zarur bo'lgan boshqa hujjatlar talab qilinishi mumkin.

10.3. Sug'urtalovchi 10.2-bandda ko'rsatilgan tegishli hujjatlar taqdim etilgandan so'ng, sug'urta hodisasini tan olish yoki olmaslik haqida qaror qabul qiladi.

10.4. Agar sug'urta hodisasi ro'y berganligi munosabati bilan sug'urtalangan shaxs yoki Naf oluvchiga nisbatan jinoiy ish qo'zg'atilgan yoki sud jarayoni boshlangan bo'lsa, sug'urta to'lovi haqidagi qarorni qabul qilish jinoiy ish yoki sud jarayoni tugagunga qadar qoldiriladi.

11. SUG'URTA TOVONI MIQDORI VA UNI TO'LASH TARTIBI

11.1. Sug'urta hodisasi ro'y berishi bilan bog'liq sug'urta to'lovi:

11.1.1. Sug'urtalangan shaxs tan jarohati olganda va/yoki sog'lig'iga boshqa zarar yetganda:

- «Baxtsiz hodisalardan ehtiyot shart sug'urta qilishning barcha turlaridan sug'urta hodisasi oqibatida tan jarohati olishi bo'yicha sug'urta to'lovni miqdorini aniqlash jadvali» (quyida «Sug'urta to'lovlari jadvali» deb ataladi) ga muvofiq sug'urta summasiga nisbatan foizlarda to'lanadi.

Bir baxtsiz hodisa oqibatida turli tashxislar bilan ta'riflanuvchi bir nechta tan jarohati olinganda, sug'urta to'lovining miqdori hamma tan jarohatlar bo'yicha to'lovlarning yig'indisini tashkil qilib, har bir sug'urtalangan shaxs uchun belgilangan sug'urta summasidan ortiq bo'lishi mumkin emas.

«Sug'urta to'lovlari jadvali» ga kiritilmagan tashxis qo'yilgan tana jarohati olinganda, to'lov Sug'urtalovchining ishonchli shifokor-mutaxassisining xulosasiga asosan «Sug'urta to'lovlari jadvali» ning tan jarohatiga to'g'ri keladigan, tegishli bo'limida ko'rsatilgan maksimal to'lov miqdori chegarasida amalga oshiriladi.

11.1.2. Sug'urtalangan shaxs I guruh nogironi bo'lganda: Sug'urta to'lovi sug'urta summasining 75 (etmish besh) foizi;

II guruh nogironi bo'lganda: 50 (ellik) foizi;

III guruh nogironi bo'lganda: 30 (o'ttiz) foizi miqdorida bo'ladi.

11.1.3. Sug'urtalangan shaxs halok bo'lganda:

- ushbu Sug'urtalangan shaxs bo'yicha oldin amalga oshirilgan sug'urta to'lovlarini chegirib qolgan holda sug'urta summasi miqdorida bo'ladi.

11.2. Sug'urta hodisalari bo'yicha barcha to'lovlarning umumiy miqdori sug'urta summasidan ortiq bo'lishi mumkin emas.

11.3. Sug'urtalangan shaxs sug'urta hodisasi natijasida halok bo'lgan holatlarida, sug'urta to'voni to'lovi Sug'urta shartnomasi (sug'urta polisi) da ko'rsatilgan Naf oluvchiga to'lanadi.

11.4. Sug'urta davri mobaynida Sug'urtalangan shaxs bilan sodir bo'lgan bir yoki bir nechta sug'urta hodisasi bo'yicha amalga oshirilgan sug'urta to'lovlarining umumiy miqdori ushbu Sug'urtalangan shaxsning sug'urta summasidan ortiq bo'lishi mumkin emas.

11.5. Sug'urta to'voni to'lovi sug'urtalovchiga sug'urta da'vo arizasi va sug'urta hodisasini tasdiqlovchi barcha zarur hujjatlar taqdim qilinganidan so'ng, 15 (o'n besh) kun ichida Sug'urtalangan shaxsning yoki Naf oluvchining hisob raqamiga pul o'tkazish orqali amalga oshiriladi.

12. NIZOLARNI HAL ETISH TARTIBI

Ushbu Oferta va sug'urta shartnomasi (sug'urta polisi) dan kelib chiqadigan barcha nizolar o'zaro muzokaralar orqali hal etiladi. Barcha nizolar bo'yicha muzokaralar orqali kelishuvga erishib bo'lmagan taqdirda, ular O'zbekiston Respublikasining amaldagi qonun hujjatlarida ko'rsatilgan tartibda hal etiladi.